



Terenga 2: Hōtaka 42 – tāku i ... ai

E mihi ana ki te rangi, e mihi ana ki te whenua. E mihi ana ki ngā uri whakaturu e noho mai nā i ngā marae kāinga huri noa i ngā motu. Nau mai, piki mai ki runga ki te waka o AKO kia hōea ai e tātou ngā moana pukepuke o te reo i waiho mai ai ki te ao tūroa.

Hei Mahi Whakarongo

Ka whakarongo tātou ki ngā whakamahuki a tētehi tokorua i tahuri ki te tito rangi hei whakawaiata i ngā kupu o tētehi karakia e rangiwhāwhā ana te rangona. Anei ngā pātai hei whakautu mā koutou:

1. He aha i whakawaiatahia ai te karakia?
2. I titoa mō wai i te tuatahi?
3. Kua rongonui te waiata nei i te aha?

He Whakamārama

Hei whakamārama i tā te tangata i mahi ai, e mahi ai rānei, ka whakamahia tēnei whakatakatoranga:

Ka whai au i **tāu e pai ai**. *I'll pursue what you want me to.*

Ka whakarongo au ki **tā** tōku matua i **kī ai**. *I'll listen to what my father said.*

Ka noho te tūmahi, te kupu mahi rānei ki waenganui i te 'i/e' me te 'ai'.

Anei tētehi ripanga hei āwhina i a koe, kia mōhio ai koe ko tēwhea te wā e kōrerohia ana

...tā...i ...ai	wā mua
...tā...e...ai	wā heke
...tā...e...nei	wā ināiane

Kei roto i Te Inoi a Te Ariki tētehi tauira pai o tēnei whakatakatoranga:

'...kia tae mai tōu rangatiratanga

thy Kingdom come

Kia meatia **tāu e pai ai** ki runga i te whenua...'

thy will be done on Earth...

Hei Manatu

Ko te kupu hei manatu mā tātou i te rā nei ko te rerenga kētanga o te kupu 'awhi' me te kupu 'āwhina'.

awhi [-hia, -ngia, -tia] (to embrace)

āwhina [-tia] (to assist)

Kia maumahara tātou, he rerekē te tikanga o te kupu 'awhi' i te kupu 'āwhina'. E rere ana te pōhēhē ko te kupu 'āwhina' te kupu hāngū o 'awhi' engari kei te hē tēnā. E rua ēnei tūmahi rerekē.

Kia kaha tā tātou whakakoikoi i ō tātou reo. Kei riro mā Pōhēhē me Kūare tātou e ārahi.

Hei Mahi

Whakamāorihia ēnei rerenga:

1. I followed exactly what you told me to do.
2. That's what he wanted.
3. The gist of what Peter's saying is..
4. Choose whatever you like.

Whakautu:

1. I whai au i tā i tohutohu mai ai.
2. Koinā tāna i hiahia ai.
3. Ko tā Pita e kōrero nei, ko...
4. Whiriwhirihia tāu e pai ai.